

Zeitschrift:	Schwyzerlüt : Zyschrif für üsi schwyzerische Mundarte
Band:	13 (1951)
Heft:	4-6
Artikel:	Bueben und Meitschi und dr Heimetschutz : ufgschriben i dr Mundart, wie me se z Matzedorf im Bezirk Bolstel-Tal redt, von Meinrad Borer, wo dört ufgwachsen isch
Autor:	Borer, Meinrad
DOI:	https://doi.org/10.5169/seals-183497

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 25.08.2025

ETH-Bibliothek Zürich, E-Periodica, <https://www.e-periodica.ch>

volli Ufgab gwagt hei, allne andere Lüt, won is mit Rat und Tat, mit Bilder und anderem bigstande si.

Ganz e gueti Idee het dismal der „Solothurner Heimatschutz“ gha. Bim Talerverchauf git es gäng zwöi- oder dreierlei Gattig Meitschi und Buebe, tel wo die Taler numen ässe (guet isch ja dä Schokola, das mueß me säge!). tel wo se chaufen und ässen, und tel wo se verchaufe (und wohlöppen au ässe?). Für e Heimatschutz si zerst die Chind am wichtigste, wo wei d Taler verchaufe. Drum sölle die beste Verchäufer — nimen ig a — ds nächste Mal als Lohn son es Büechli übercho, dermit sie no meh Muet und meh Freud hei für ihri gueti Sach. Und so nimmt üs der Solothurner Heimatschutz es stifs Hüüfli vo üsne Büechli ab und bewist dermit, daß er weiß und versteit, wie der Sprachschutz nid öppen e veralteti Moden oder e Näbetsach isch. Nei, ds Istah zum Solothurnerdütsch und zum Schwyzerdütsch überhaupt, isch der nötigst und wichtigst Heimatschutz, will men i der Sprach vom Müeti und Ätti, i der Sprach vo üsem Volch und über Heimat am ringsten uf ds Läbige reckt, am ringste dä Geist und die Chraft gspürt und trifft, wo macht, daß mir Eidgenosse si, wo macht, daß mir — trotz em Dörfli- und Kantönlegeist (es git e wahren und e falsche) und anderne chline Geister — doch es Volch und e Staat si, daß üses freie Land Sinn, Wärt und Bestand het.

G. S.

Bueben und Meitschi und dr Heimetschutz

Ufgschribe i dr Mundart, wie me se z Matzedorf im Bezirk Bolstel-Tal redt, von Meinrad Borer, wo dört ufgwachsen isch.

«Jökeris, jetz chunnt do einen und schrybt öppis über Heimetschutz! Weiß ächt dä nit, aß das nüt isch für eus Bueben und Meitschi? Eus intressiert doch numme d Turdöswiss, dr Rot Pfyl, denn öppe no d Schiikanonen und d Fueßballeler, d Segelflügger und di amerikanische Dschipp und was süsch no derigg um e Wäg isch; denn au no d Briefmarge, d Schoggelahelgeli und d Prysrätsel, wo d Lehrer albe no sette hälfe mitrote. Das si di Sache, wo mr eister stramm drby sy, aber nit Heimetschutz! Das isch doch öppis für di große Lüt, für Baumeischter und Gmeintröt und für die, wo albe wäge däm Züög i d Zitige schrybe!»

Nei, dir Bueben und Meitschi, dir sit lätz dra, dr Heimetschutz isch au öppis für euch. I meinen aber nit numme dr guldig Heimetschutztaler mit däm guete Schoggela drin, nenei, dä isch nit d Hauptsach dra. Aber schön sy si einewäg, gället? Lueget, dr Heimetschutz isch öppis so eifachs, daß dr mängisch an em verby stolperet, will dr meinet, es stecki öppis ganz angers

derhinger, wo dr no nit verstöjet. Dir heit doch scho mängisch gseit, das und däis sig schön, wills ech gfalle het, oder es sig wüescht, und heit d Nase grümpft drwäge. Mängisch breichet ers, aber hie und da hauet dr holt au drnäbe, so zum Bispil, wenn dr i eui Adängkealbümlı usgschtanzti Ängelchöpfli, Vergißmeinnichtblüemli oder Rosechnöspeli inechleibet, statt aß dr öppis tüejt zeichne, au wvens nit so schön usechunnt, wie drs gärn hätten. E Teil von ech het au no Freud a de verguldete Gipsfigürli uf dr Gummoden obe und a de papirige Meie i de verchremätzlete Bluemevase, wo einisch öpper vo dr Chilbi heibrocht het. Silberdischtle, Strauröseli, Judechirsi, ne Buschelen Ehri oder ne Mischtlezwiig isch ebe so schön oder no schöner, will si vom Herrgott gschänkt sy und nit in ere Fabrigge künschtlig noche gmacht. Au vo de Kanebeechüssi gubs no öppis z reden, aber das lói mr für hüt lo sy.

Heit dr jetz gseh, dir Chinge, dr Heimetschutz isch doch nit so wyt wäg von ech, wie dr zerscht gmeint heit! Jetz wott ech no verzelle, wienis einisch uf e me Schuelspaziergängli dr Heimetschutz begägnat isch. Au euch chan er ebcho, wenn dr eui Augen e chli bruchet.

Gli ussen am Dorf si mr imene Bächli no gange, wos am Bord vil Gschtüüd gha het: Hagröseli, Tuubechnöpf, Haselstuude und Pfaffehüetli. D Vögeli hein anger gwarnet, wo mr nöcher cho sy und hei s Päch kauft. I ha do gseit, wie das schad wer, wenn jetz das Ghürscht alls abghaue würdi und wie das Bächli täti eitönig usggeh, wvens nümme dörfti nochewachse. Und wo wetten au alli die chlinen und große Vögel ihri Näschtli baue, wo wetten au d Hase und d Igel ihri Junge chönne verstecke vor dene, won e se gärn wette frässe, wenn die läbige Heg im Fäld rübis und stübis usgrottet würde? Wo mr wyters glaufe sy, hei mr über ne Stäg müeße, wo us dicke Brättere gmacht gsi isch und gli drufabe no einisch über nes steinigs Brüggli mit schönen alte Gwölbstei, wo scho mängs hundert Johr olt isch. Wyter nide het eus no nes dritts Brüggli zum Drüberlaufen yglade, aber mr hei kei Luscht gha drzue, will s numme us Beton gmacht isch mit e me Gländer us ysige Röhre. Es het is dunkt, das passi jetz au gar nit i die schöni Geget yne und heis links lo ligge. Nachhär sy mr a Waldrang ufe, für is Täli abe z luege. D Buredörflı het me fasch nit gseh, will si si ganz i den Obschtbüüm inne versteckt hei. Aber s Fabriggedorf het i d Geget use grännnet mit ne paar Hüüser, wo usggeh hei wie steinigi Chischte. Nit emol Decher hei si gha, eifach obenoche ebe zudeckt, grad wie mit e me Chischtedeckel. Näbe me schöne Hüslı hei mr ne Chüngelistal entdeckt, wo mit Wällbläch deckt gsi isch und a de Wäng mit farbige Reklametafele vermacht. Mir si nit

die einzige, wo dr Meinig si, die zwöi passen aber au gar nit zäme. Wo mr später bi men e Oberländerschalee verby sy, het eine vo de Buebe gmeint, so eis hätt er au gärn einisch; aber e paar angeri hei gseit, dere Hüüser mach me doch nit bi eus umme, die gchöre nit i die Geget. Und de tüeje si se erscht no so dunkel astriche, es mach eim fasch Angscht.

Bim Witerwandere hei mr e ganz glungnige Garten atroffe: dr Gartehag het usgseh wie verschlungnigi Escht, mit Bire dra und Öpfel, derzwüsche Rosen und Tulpe, und uf de Zwiiglene Vögeli und Müüs, alls zäme us Zimänt gmacht! Do hei mr doch alli müeße graduse lache und hoffetlig anger Lüt au. Im Garten inne hets Zwärgli gha, mit glaarige Farben agstriche, und Rehli derby, alls us Lätt brönnt. Mir hei die Studen und Meie no lang nit alli bchönnt, es si drum derigi gsi us frönde Ländere, wo me nit grad vilmol atrifft. Es Meitschi het gseit, ihm gfallen ihri Stockröseli und Sunneblueme, d Chappinezinerli und der Phlox de doch no besser und ihri Nochbersfrau heigi au gseit, si wetti i ihrem Garte au kei derigs fröndländischs Gschmeus ha.

Jo, so isch das gangen uf dem Spaziergängli, mr hei no vil derigs gwahret und no vo mängem gredt, aber es gieng vil zlang, wenn ig das alls wett verzelle. Eine vo de Buebe het die Sach ärnscht gno und gmeint, wenn er de einisch Gmeinrot syg oder Architekt, well er denn scho luege, aß nit so wüeschts Züüg bauet wärdi und aß nit alli Stude im Fäld usse abghaue wärde, im Gegeteil, no meh so läbige Heg welle si de mache. Nen angere will denn, wenn er im Turnverein sig, numme no schwyzerischi oder sogar soledurnerdütschi Theaterli lo spile, nit e so zuckerwasserigi Tirolerstückli. Rächt het er, eusi Sproch isch doch so schön, wärtvoll und heimelig, s isch jo eusi Muettersproch, und wenn er se de als Presidänt einisch richtig redt, nit umme so, wie mes i de Kommissione tuet, denn wei mr eus freue! Au d Meitschi, ömmel ne Teil drvo, hei gueti Vorsätz gfasset. D Nädere müeß ne zeige, wie me die schöne Stickerei für Trachte machi, si welle drum, wenn si us der Schuel sige, au lere die alte Volkstänz und Volksliedli ufführe. Do drzue bruche si doch e Tracht, d Soledurnertracht, si choscht glaub e chli vil, aber d Vätter wärde wohl de nüt dergege ha. Mr weis hoffe! Hoffe wei mr aber au, daß die Buebe später einisch a dä Schuelspaziergang dänke und au a das, was si versproche hei. Wenn si einisch hälfe d Wält regiere, und wenns numme die chlini aber schöni und liebi Wält isch, wo mr deheime sy!

